

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 496786 25 St
Tuzla, 05.05.2026.godine

Općinski sud u Tuzli, sudija Antonela Đaković, kao stečajni sudija, u postupku prethodnog ispitivanja prijedloga za pokretanje stečajnog postupka nad dužnikom „AB HUREM TRANSPORT“ d.o.o za transport, promet i usluge Kalesija, Dubnica b.b., dana 05.05.2026. godine donio je

RJEŠENJE

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na depozitni račun Suda, broj: 132-100-03091233-91 NLB banka dd Sarajevo, predujme iznos od 2.290,00 KM, na ime obezbjeđenja troškova stečajnog postupka nad dužnikom „AB HUREM TRANSPORT“ d.o.o za transport, promet i usluge Kalesija, Dubnica b.b., te da dokaz o izvršenoj uplati dostave sudu pozivom na broj predmeta.

Ukoliko u ostavljenom roku niko od pozvanih ne predloži otvaranje stečajnog postupka i ne uplati određeni predujam, sud će donijeti Rješenje o otvaranju i istovremenom zaključenju stečajnog postupka.

Ako zainteresovana lica predlože otvaranje stečajnog postupka i uplate određeni predujam u navedenom roku, sud će otvoriti stečajni postupak i voditi ga u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

Obrazloženje

Sud je dana 26.01.2026.godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva „AB HUREM TRANSPORT“ d.o.o za transport, promet i usluge Kalesija, Dubnica b.b, a za privremenog stečajnog upravnika imenovan je Adil Bašić iz Tuzle, ul. Maršala Tita 2B. Dana 24.03.2026.godine privremeni stečajni upravnik je dostavio Izvještaj o provedenom prethodnom stečajnom postupku.

Iz izvještaja privremenog stečajnog upravnika proizilazi da je djelatnost društva za koju je društvo bilo osnovano Cestovni prijevoz robe, a da je osnivač društva Mirsad Huremović. Preduzeće je od osnivanja obavljalo djelatnost do 2019. godine, kada je na osnovu odluke osnivača društva utvrđen prestanak, a zadnji transakcijski račun je blokiran 2022.godine, kada su nastali određeni problemi izazvani poremećajem tržišta, te je društvo 2025. godine donijelo odluku o prestanku rada društva i pokretanju stečajnog postupka. Uvidom u spis suda i Uvjerjenje izdato od Porezne uprave Federacije BiH, Kantonalni porezni ured Tuzla, Porezna ispostava Tuzla, broj: 13-3/10-12-5-9025/2025 od 21.11.2025. godine, utvrđeno je da porezni obveznik ima duga po osnovu javnih prihoda i isti iznosi 12.155,85 KM. Također, prema Uvjerjenju Uprave za indirektno oporezivanje, Regionalni centar Tuzla, broj: 02/6/IV-16-11-21-9524-1/25 od 24.11.2025. godine

ima dug u iznosu od 335,00 KM. Nadalje, utvrđeno je da društvo nema nikakve knjigovodstvene dokumentacije i arhive, niti bilo šta vezano za društvo „AB HUREM TRANSPORT“ d.o.o. za transport, promet i usluge Kalesija, Dubnica b.b., obzirom da društvo ne posluje preko četiri godine. Također, Uvjerenjem broj: 029-0-Rz-26-000 057 od 04.03.2026. godine, izdatim od Zemljišno-knjižnog ureda Općinskog suda u Kalesiji i Uvjerenjem broj: 02/2-2-26-714/26-1 od 04.03.2026. godine, izdatim od Službe za geodetske i imovinsko-pravne poslove Općine Kalesija, utvrđeno je da društvo nije upisano kao vlasnik i posjednik nekretnina. Također, Uvjerenjem broj: 08-03/4-7-03.9-14/26 od 05.03.2026. godine, izdatim od strane Ministarstva unutrašnjih poslova Tuzlanskog kantona, Odsjek za administraciju Kalesija, utvrđeno je da privredno društvo u svom vlasništvu ima teretno vozilo marke i tipa DAIMLER-BENZ 1928 K, broj šasije WDB62111715400814, registarske oznake 065-K-260, sa napomenom da je vozilo objavljeno po službenoj dužnosti 18.09.2018. godine, kao i teretno vozilo marke i tipa MERCEDES-BENZ 2635, broj šasije WDB64933815404655, registarske oznake 222-M-569, sa napomenom da je vozilo objavljeno zbog prodaje u BiH 21.05.2014. godine. Glavni transakcijski račun društva je blokiran, kao i ostali računi, a na istima nema novčanih sredstava. Stečajni upravitelj je utvrdio da društvo nema nikakve nepokretne niti pokretne imovine na raspolaganju. Na dan otvaranja prethodnog postupka društvo nema zaposlenih lica. S obzirom na činjenično stanje imovine, društvo nema mogućnost nastavka poslovanja.

Na osnovu svega gore navedenog, evidentno je da postoji stečajni razlog za otvaranje stečajnog postupka, a prema Zakonu o stečaju FBiH, stečajni upravitelj predlaže otvaranje i zaključenje stečajnog postupka jer nema imovine iz koje se mogu podmiriti troškovi vođenja stečajnog postupka kao ni za namirenje povjerilaca.

Stečajni dužnik a što proizilazi iz izvještaja i mišljenja privremenog stečajnog upravnika nije u roku od 60 dana od dana nastupanja platežne nesposobnosti podnio prijedlog za otvaranje stečajnog postupka.

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema imovine za podmirenje obaveza, sud je u smislu odredbe čl. 102 stav 7. Zakona o stečaju pozvao povjerioce i sva zainteresovana lica da izvrše uplatu troškova finansiranja stečajnog postupka u visini od 2.290,00 KM iz kojih sredstava će biti finansirani svi troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava), obzirom da prema prijavi privremenog stečajnog upravnika društvo ne posjeduje imovinu.

Ukoliko povjerioci ili neko od zainteresovanih lica u ostavljenom roku ne izvrši uplatu preduma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102. stav 8. Zakona o stečaju (Službene novine FBiH broj 53/21).

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

Stečajni sudija

Antonela Đaković

POUKA O PRAVNOM LIJEKU: Protiv ovog rješenja nije dozvoljena žalba.